

Proceso di negociacionnan di posibel reapertura di refineria a bay den diferente fase



ORANJESTAD(AAN): Mr. Hans Sjiem Fat ta consehero legal di gobierno pa loke ta e asunto di e posibel reapertura di e refineria, negociacionnan cu Citgo y Valero. Sjiem Fat a splica cu el a worde acerca den di dos mita di 2015, unda cu tabata tin varios biahe cu a haci cu diferente minister. Entre otro Hulanda y hopi biahe a haci'e na Houston pa combersacionnan cu Citgo, desde cu a compronde cu nan ta seriamente interesa den opera e refineria aki na Aruba.

E proceso a bay den diferente fase, entre nan tabata a firma un MOU, es decir, un combenio cu ta bisa basicamente cu e partidonan ta interesa pa drenta den negociacion riba un posibel transaccion pa opera e refineria na Aruba y cu nan ta bay pone nan ekipo pa haci investigacion nan prome luga, pa wak si en berdad e refineria ta cuadra cu loke ta nan expectativa pa opra un refineria na Aruba y den cuadro di esey ta haci locual ta yama "Due Diligence Investigations", unda cu expertonan tecnico, financiero ta wak e instalacionnan y ta dicidi si en berdad esaki ta algo cu nan kier sigui riba dje. Esey a worde sigui pa un fase di negociacion, over di e aspectonan principal di e transaccion.

Tin algun punto cu kisas ta di interes of atencion, na momento cu ta na mesa. Sjiem Fat a comenta cu nan a topa diferente biaha na Houston y na Aruba tambe, den e ultimo tres lunanan. Naturalmente e

discusion y negociacionnan ta bay over di e puntonan mas importante di un transaccion manera cu ta negociando awor aki.

Semper un di e puntonan importante den esey ta, kico ta bay ta e regimen fiscal cu e compania ta haya si e mester establece su mes na Aruba.

Otro pregunta ta, kico ta bay ta e estructura di e transaccion. Ta bay tin un compra y benta di e refineria of Citgo ta bay huur e refineria. Otro pregunta cu ta worde discuti ta kico ta bay ta e duracion di e combenio di e operacion di e refineria si mester ta 10, 20 of 25 aña. Si mester tin extension di e plazo cu nan ta bay huur e operacion. Otro pregunta ta si e transaccion ta bay cover tanto refineria, e transshipment terminal y sales & marketing local na e stacionnan di gasolin local, pero tambe na e bunkering di barconan y jetfuel supplies pa e avionnan cu sa bin Aruba. Naturalmente semper tin aspectonan di medio ambiente cu mester worde discuti den un transaccio asina.

Ademas manera cu por compronde, ta un transaccion cu no ta solamente dos partido, mester yega na un entendimento na otro, pero tin un di tres partido cu ta operador y doño actual di e refineria, esta Valero. Valero tambe mester bay di acuerdo cu full e transaccion y tin cu sinta na mesa tambe cu Valero pa ta sigur cu nan tambe ta di acuerdo cu e transaccion bao di e condicionnan cu ta negoshando cu Citgo, Sjiem

Fat a splica.

E ultimo biaha cu a topa siman pasa. Tabata tin un team negociador di Citgo na Aruba pa casi full e siman y a topa tur dia. Idea ta pa uza e siman aki. Di parti di gobierno pa refleha riba e posicionnan cu a worde presenta siman pasa di parti di Citgo. Citgo, pa refleha riba e posicionnan cu worde presenta di parti di gobierno di Aruba y tin planea tambe pa combersa cu Valero riba diferente aspecto di e transaccion durante di e siman aki. Pa otro siman, sea aki na Aruba of na Houston, por sigui cu e negociacionnan cu Citgo riba e transaccion.

E deadline te awor aki ta fin di Maart. Idea ta pa fin di Maart mester bin un closing, esta un ceramento di e transaccion, unda cu tur e puntonan final mester bin den e combenio y cu e partidonan ta firma cu nan ta di acuerdo y cu e transaccion ta cuminsa y ta spera cu por cumpli cu e deadline eynan, Sjiem Fat a splica.

E team cu ta negosha, semper tin cu bay back na nan superior. Den caso di Citgo, e team negociador mester bay na e board of directors di Citgo pa nan haya aprobacion pa posicionnan cu a worde tuma den e negociacion y di parti di Gobierno, e negociadornan mester bay na minister de Meza, kende ta encarga cu e transaccion y e na su turno mester consulta cu su coleganan den conseho di ministronan over di varios aspecto di e transaccion, Sjiem Fat a muestra.